



Inatsisartunut ilaasortaq Saxdorph Didriksen
Inatsisartut
/MAANI

Immap itissusiata nalunaarsorneqartarnera saniatigut immap kissassusaata nalunaarsorneqartalernissaa pillugu § 37 nr. 2014-166-imut akissuteqaat.

Inatsisartut suleriaasianni § 37, imm. 1 naapertorlugu Naalakkersuisunut apeqquteqarsimavutit immap itissusiata nalunaarsorneqartarnera kissassusaamik annertusineqarnissaa pillugu. Apeqqutigineqartoq uannut akisassanngortinneqarsimavoq.

Apeqqut:

Kalaallit Nunaanni qalorsorluni aalisarnermi itissutsip nalunaarsorneqartarnerata saniatigut immap kissassusaata nalunaarsorneqartalernissaa Naalakkersuisut pilersaarutigaat?

Akissuteqaat:

Naalakkersuisut paasinnilluarput kissassutsimik uuttortaasarnerit aalisarnermi ilisimatusarnermut annertuumik naleqarsinnaammata, kiisalu aamma silaannaap pissusaanik ilisimatusarnermut allanullu.

Taamaasilluni Aalisarnermut, Piniarnermut Nunalerinermullu Naalakkersuisoqarfiup NEAFC-imi (Atlantikup avannamut kangiani aalisarneq pillugu ataatsimiititaliarsuaq) nakkutilliinermik suleqatigiinnermut atatillugu oqaatiginikuuaa, kissaatiginartinneqarsinnaasoq, qalorsuorsorluni aalisarnermut atatillugu immap naqqata kissassusaanik nalunaarsuisoqartarnissaa nalunaarusiortoqartarnissaalu.

Taamaattorli nalinginnaasumik ajornartorsiutinik apeqqutinillu arlalinnik peqarpoq iluarseqqaarneqartariaqartunik, immap kissassusaa pillugu nammineq piumassuseq atorlugu imaluunniit inatsisiliornikkut malittarisassamik eqqussisoqassapat.

Immap naqqani immap kissassusaanik nalunaarsuisarnissap eqqunneqarnissaani pisariaqartinneqarpoq, ersarissumik nassuiaasiortoqarsimanissaa, kissassuseq sorleq pinneqarnerisooq aamma qanoq iliorluni tamanna uuttorneqartassanersooq nalunaarsorneqartassanersorlu. Pingaaruteqarpoq, tamatuma 100 %-imik assigiiartumik pisarnissaa, taamaasilluni paasissutissat ilisimatusarnikkut siunertamut ilaatinneqarsinnaaniassammata. Elektronik atorlugu logbog-ilersuisarnissamut ikaarsaarnermi tamatuma eqqunneqarnissaa naleqqunnerpaassaaq, tassami aalisartut ilisimatusartullu logbog-iliornermiinni pappiaqqanik tuninissaminut killilersimaneqarunnaassammata.

Kalaallit Nunaanni Aalisarsinnaanermut Akuersissutinik Nakkutilliisoqarfiup (KANUAA-NA-p) nalunaarutiginiikuuvaa, immap kissassusaanik pinngitsoorani nalunaarsuinerup eqqunneqarnissaani pisariaqartinneqartumik nunani tamalaani malitassatut aalajangersakkat malinneqartariaqassasut, taamaasilluni tamanna nalinginnaasumik tamanut eqqunneqarsinnaaniassammata, taamaasillutik nunani allamiut angallataat Kalaallit Nunaata imartaani aalisartut aamma kissassutsinik nalunaaruteqarsinnaaniassammata.

13-08-2014
Suliap nr 2014-102533
Upp. normua 1658265

Postboks 269
3900 Nuuk
Oqarasuaat (+299) 34 50 00
Fax: (+299) 34 63 55
E-mail: apnn@nanoq.gl
www.naalakkersuisut.gl

Taamannalli malittarissamik nalinginnaasumik eqqussiniarneq sivisuumik pisinnaavoq, tassami taamaasiornissami pisariaqartinneqarmata nunani tamalaani isumaqatigiittoqarsimanissaaa, aammalu ataatsimoorussamik nunani tamalaani malitassatut aalajangersakkamik pilersitsisoqarnissaa, qanoq iliorluni kissassuseq uuttortarneqartassanersoq, nalunaarsorneqartassanersoq kiisalu paasissutissat qanoq ittuussanersut. Paasissutissat qanoq ittuunissaat, kissassutsimik uuttuisarneq arlaatigut iluaquteqassapat, FN-imi suliniaqatigiiffik UN/CEFACT aqutugalugu malitassatut aalajangersarneqassaaq.

Taamalu Kalaallit Nunaata kissaatigippagu nunami namminerme kissassutsimik uuttortaasernerup eqqunneqarnissaa taamaallaallu aamma kalaallit angallataataannut iluaqutigineqarsinnaanera annikitsuaraassaaq, taamalu aamma annertuumik mianernartoqasalluni, KANUAANA-mit namminneq periusaatitik allanngortissagunikkit, nunani tamalaani malitassatut aalajangersagaq malinneqassasoq aalajangiunneqassapat. KANUAANA-p nalilerpaa, nutaamik ineriartortitsinermut nalequssaaneermulluunniit akigititaq akisoorujussuanngorsinnaassasoq.

Qularutissaanngilarli, kalaallit kilisaataasa angisuut nutaaliaasullu kissassutsimik uuttortaasissamut atortuuteqarnissaat, angallatilli pisoqaanerisut qularnanngitsumik taamatut atortuuteqanngillat, taamaattumillu eqqarsaatigineqassaaq, kilisaatit tamarmik peqquneqassanersut kissassutsimik nalunaarsuisarnissamut. Kilisaatinut arlalinnut pissarsiniarnissaaq akisungaatsiartunngorsinnaavoq.

Piffissami maannakkorpiaq KANUAANA-mit eqqarsarnartoqartinneqarpoq elektronik atorlugu aalisarnermut logbog-imi paasissutissanik nutaamik immikkoortunik eqqussinnaanissaaq, piffissarpiami tassani Atlantikup avannaani nunat tamarmik pimoorussilutik suliaqartut Elektronik atorlugu Nalunaarutiginnittarnissamik periutsip atortuulersineqarnissaa, tassani logbog-i aamma ilaalluni.

Aalisarnermut, Piniarnermut Nunalerinermullu Naalakkersuisoqarfiup aamma KANUAANA-p suli sulissutiginiarpaa nunani tamalaani pinngitsoorani kissassutsimik uuttortaasernerup eqqussinneqarnissaa, piviusorsiortumilli isigalugu tamatuma eqqunneqarnissaanut suli ukiut arlallit naatsorsuutigineqartariaqassapput.

Pinngortitaleriffiup immap kissassusianik nalunaarsugaatai qangalili pisuupput, pisoqaanerppaaq 1875-meersuulluni. Pinngortitaleriffiup angallataatai Paamiut aamma Sanna ukiut tamaasa angalanerminni immap kissassusianik uuttortaasarput. Tyskit immamik ilisimatusarluni misissuutaat Walther Herwig immap kissassusianik 1982-miilli uuttortaasalerpoq. Pinngortitaleriffik isumaqarpoq aalisariutit immap kissassusianik aamma uuttortaasalerpata, tamanna paasissutissanik peqalertitsinerulissasut.

Inussiarnersumik inuulluaqqusillunga

Finn Karlsen